

第一名 江曉輝

個人簡介：清華大學中國文學系博士四年級

學士、碩士畢業於國立中山大學，香港僑生，曾獲獎項：

- (香港)第31屆青年文學獎徵文比賽新詩高級組亞軍及優異獎
- (香港)第32屆青年文學獎徵文比賽新詩高級組優異獎
- (香港)第33屆青年文學獎徵文比賽新詩高級組優異獎
- (香港)第34屆青年文學獎徵文比賽新詩高級組冠軍及優異獎
- (臺灣)第一屆「曉境雲聲」古典詩歌創作比賽七言律詩組第五名
- (臺灣)第17屆西子灣文學獎古典詩詞組貳獎
- (粵港澳臺)第3屆粵港澳臺大學生詩詞大賽詩組季軍
- (臺灣)第18屆西子灣文學獎古典詩詞組貳獎
- (臺灣)第19屆西子灣文學獎古典詩詞組參獎、現代詩組首獎
- (臺灣)第20屆西子灣文學獎古典詩詞組首獎
- (臺灣)第21屆西子灣文學獎古典詩詞組首獎、古典詞組參獎
- (臺灣)第29屆中興湖文學獎全國徵文比賽古典文學類第二名
- (臺灣)第30屆中興湖文學獎全國徵文比賽古典文學類第三名
- (臺灣)第31屆中興湖文學獎全國徵文比賽古典文學類第二名
- (臺灣)第32屆中興湖文學獎全國徵文比賽古典文學類第一名
- (臺灣)第33屆中興湖文學獎全國徵文比賽古典文學類第一名
- (臺灣)第34屆中興湖文學獎全國徵文比賽古典文學類第二名

遊書肆

市隱嫻嬛汗漫遊，逍遙祿網與名囚。幾函書接千年夢，一室香聞四野秋。每讀新知忘日月，能尋絕版抵公侯。茫茫學海元無岸，到此真成不繫舟。

輓劉曉波先生並感中港近事

天何鶉首賜嬴秦，六十餘年劫數真。商鞅漫興國安法，茅焦豈有再來人。焚書不許翻牆外，坑士將疑到海濱謂709大抓捕也。姬衛空承周正朔，也隨風雨喪胡塵。

參貢寮靈鷲山無生道場

欲迎風快洗頽顏，來覓心源翠野間。法眼虛空山門上有兩眼，名「天眼門」觀性海山寺臨海，浮屠不動山上有塔林駐靈山。坐寒巖穴瀕千日開山和尚心道法師於山上法華洞斷食參禪兩年餘，參破禪門第幾關。我與祖師何所見，一雲癡滯一雲閒。

深冬雨後遊城門水塘

履跡重尋日，林霏帶雨深。猿啼隔煙外，鱗影動池陰。山入寒中定，花開悟後心。仄途分暗綠，獨我踏蕭森。

窮神夜訪

風寒星黯夜深辰，忽聞剝啄共酸呻。開門又見故人面，蓬首瘦頰乃窮神。兩足蹇澀腰已折，愁眉何時添一顰。苦水三杯聊作酒，知己聚飲吐語真。喻我如鷹鍛羽翼，澗底冬樹雜荊榛。更將焦燎陷車轍，枯魚之肆在比鄰。我笑我非浮士德，昏燈兀坐一畸人。乖時謬世自深悉，何勞尊駕夜訪頻。邇來牛性尤兀傲，骨相單寒豈無因。羽翰摧殘舊可換，霜枝當陽即弄春。枯魚乾渴亦有夢，得雨昇雲化碧鱗。天設愁城作爐鼎，天遣使君作炭薪。欲以孤窮久煎迫，煉我鐵志與金身。多謝使君來相告，成器尚欠三分貧。但有詩筆心未死，與君周旋豈可馴。

危言

曾思中文系，五濁世裡一蒹葭。曾思上庠學，世塵不染湛清華。仰止高山行誼古，丰神能接晉唐賒。進則易俗移風干氣象，退亦從容閒種東陵瓜。切膚醒歎華胥夢，博士平民兩無差。委蛇求職同爾爾，都為柴米油鹽醬醋茶。韶華草草豈無憾，伏案長年背如蝦。鍵盤長敲字接字，園林空落花復花。所識多是陳死者，唯友古人與暮鴉。出門裘馬輕肥過，勞勞問道空負家。一本論文何年得，幾人能博學界誇。可笑連篇文字障，饒益不及下里巴。問學攻專如挖井，越久坐成井中蛙。象牙塔裡遭寂寞，高鳴互奏鼓與笳。研討會上頻握手，吹者捧者攀者附者紛如麻。不然名字著作無從見天日，更恐考評成咨嗟。莫謂市井計功利，投稿亦為討生涯。核心期刊分等第，屈指分數漫相加。鷓鴣空羨大鵬翼，村雞還覓米須些。嗟哉學界生態乃如此，唯有添足苦畫蛇。

落葉詩

春花常恐秋光早，秋葉隨任風中老。秋魂化作蝶紛飛，焉共百花閒愁惱。春來又怨人未知，春去又怨東君遺。濃脂膩粉爭一顧，枝柔瓣軟態矜持。落溷何所悲，墜茵何所喜。花塚不埋散士心，星愁點恨尋常耳。豈及秋光一動掃九垓，萬木香風捲地來。遍野殘紅絕綺艷，蕭瑟搖落亦快哉。如蚩尤怒萬古烈，威靈長染漫山血。老楓盜飲天酒歸，酩酊醉魄醒未徹。又如羲和遣金鴉，毛羽散作西天霞。十萬紅衣天魔來獻舞，飛墜迴旋紛交加。倦時堪掃落葉深一尺，坐作團團眠作席。閒則燒葉小紅爐，煎茶燙酒煮白石。聞說人間未周全，女媧百煉猶惘然。聊寫一葉非詩亦非偈，吹上清微重補缺憾天。

月悠悠行參用長吉體 中秋作

星塵初淨地初凝，濛濛綠翳雲雨蒸。起陸魚龍埋山骨，滄海幾浮太古冰。萬族何為苦遷徙，漫將文明寫故紙。殘戈折劍到火雲，劫灰飛入暮色紫。地輪霍霍月旋遠，壞空成住流光沓。一丸湛藍掌中看，地沉海立波森森。老兔寒蟾葬月窟，姮娥憶斷空白髮。當年月國聞丁丁，爛柯如今不可伐。

西藏納木措畔夜攝星空

地僻兩戒絕，山雄九服荒。穹廬賴以柱，天幕此開張。龍脊太古雪，群峰幻劍鉞
湖側為念青唐古拉山主峰，高七千餘公尺，終年積雪。歛息收雲氣，銜日斂紫黃。崢嶸歸靜穆，
盤護湖泊洸。廣澈如性海，有島號吉祥湖中最大島藏語意為吉祥。罡風自霄外，吹轉陰
與陽。我來叩靈境，高絕步空涼。濺濺天河水，銀沙星宿煌。浩瀚流天際，滿注
一湖霜。維北傾寶斗，為我酌雲漿。雲漿非俗醉，醞釀醒心盲。醉中乃不畏，探
首天外昂。神樞移象緯，天運不能詳。森羅垂列宿，風動如鈴鐺。大音超六律，
聽此天籟揚。又如帝網現，牟尼綴十方。諸天相涵攝，寶色幻彩芒。當年佛在世，
所見同此光。光中參定慧，了了作空王。我心遊萬象，我身白塔旁。華嚴三千界，
涵虛一鏡藏。寫真飛星入，銀河流愈長。宇宙生宇宙，無量復無量。

反招魂

劉曉波先生被囚禁至死，遺體被迫火化，骨灰沉於海，竟無葬身之地，人神
共憤，四海同悲。昔屈子賦〈招魂〉，以四方險惡，虎豹環伺，恐楚王神離
魂散，為其所害，故招之歸。今則境內洶洶，境外反為安全之地，故反用其
意，作反招魂。

哀忠諫之不察兮，今與古其同忌。逢獨夫之暴怒兮，桎梏加而勞瘁。妻何辜以坐
連兮，長禁步以幽閔。歿而不得葬兮，焚枯骸兮沉海水。亦屈子之耿潔兮，懷仁
德同未遂。漁父歌以勸兮，靈氛卜而有示。信高丘已無女兮，眾淫靡而不義。九
閭閉而難叩兮，帝瞽瞍兮天醉。魂毋歸來，故國不可留些。腐水穢土，幽蘭不以
孳些。腥風緇塵，芳馨不可久些。霸道囂囂，民性不復初些。刀槍斧鉞守於外，
蛇鬼魍魎踞於內。毒涎利爪，磨牙格格，苟歸來兮，喪魂奪魄。胡不遊乎四海兮
遠囹圄，四方清寧兮無禁錮。自由兮長誦，自在兮無苦，往極樂兮莫反顧。魂毋
歸來哀中華。